

太上說無上恩重報父母經各懷涕淚受斯語已愈感孝誠刺骨不忘尊敬殷重各還本國稽首奉行

太上老君說報父母恩重經

玄天上帝說報父母恩重經

妙緣無修妙行無積從修有修修緣證妙從積有積積行通妙妙本從無修積自有廣演妙緣願言勸修煩絲妙行示相有積妙緣妙行既通修積若世眾生一念一動緣行俱在迷感本來毀無失有知人父母誕生男女始相不見託相為有中相相化萬狀艱難苦惱憂慮悲感從相起我既託相日惱父母令我父母日夕悲酸我相既有父相母相日漸衰朽緣我相故令我父母始相沉埋父母男女輪轉無已。是此有相同歸苦惱我從今日從我相中悉滅貪嗔惡破險峻持念平等用報始相使我始相大得快樂無諸苦惱世世生生託相全具不致衰朽然後滅除始相令無相者將此無著同滅始相我相始相悉歸無著相既無者不見不有不起不為無疑無障無閉無塞自然去累不墮苦海普願欽信日持奉行

玄天上帝說報父母恩重經

玄帝報恩聖號

志心皈命禮玄元應化武曲分真垂念我等眾生有相託生父母懷胎十月乳哺三年辛苦百千殷勤寸念令我父母日漸衰朽我今持念平等悉滅險峻貪嗔禮帝為師祈恩報本願我見在父母福壽增延過去父母早得超生大聖大慈大仁大孝八十二化報恩教主佑聖真武治世福神玉虛師相玄天上帝金闕化身天尊

昔秦清大帝第八十二次化身托聖父淨樂國王聖母妙祥天主降生為太子纔七歲即離親去國潛身入太和山中修道歷四十二年功成冲舉位鎮北方為玄天帝感父母生恩之重故說此經若有善信男女體玄天聖訓以孝道存心持齋三年禮念聖號一萬八千遍以按道經一藏篇目之數以答父母三年乳哺之恩有志之士又能尋詳經義精進道功雖億劫四重之恩皆可以報而九幽三途之苦亦可以濟矣豈但報父母之恩而已哉傳曰仙經

萬卷忠孝為先又曰一子學道則九祖生天其斯之謂歟玄門洞教凌儀趙宜真書

道德真經卷上

體道章第一

道可道非常道名可名非常名無名天地之始有名萬物之母常無欲以觀其妙常有欲以觀其微此兩者同出而異名同謂之玄玄之又玄衆妙之門

養身章第二

天下皆知美之為美斯惡已皆知善之為善斯不善矣故有無之相生難易之相成長短之相形高下之相傾音聲之相和前後之相隨是以聖人處無為之事行不言之教萬物作而不辭生而不有為而不恃功成不居夫惟不居是以不去

安民章第三

不尚賢使民不爭不貴難得之貨使民不為盜不見可欲使心不亂是以聖人之治虛其心實其腹弱其志強其骨當使民無知無欲使夫知者不敢為也為無為則無不治矣

無源章第四

道冲而用之或似不盈淵兮似萬物之宗挫

蒸

其孰解其紛和其光同其塵湛兮似或存吾不知其誰之子象帝之先

虛用章第五

天地不仁以萬物為芻狗聖人不仁以百姓為芻狗天地之間其猶索索乎虛而不屈動而愈出多言數窮不如守中

成象章第六

谷神不死是謂玄牝玄牝之門是謂天地根綿綿若存用之不勤

韜光章第七

天長地久天地所以能長且久者以其不自生故能長生是以聖人後其身而身先外其身而身存非以其無私耶故能成其私

易性章第八

上善若水水善利萬物而不爭處衆人之所惡故幾於道居善地心善淵與善仁言善信政善治事善能動善時夫惟不爭故無尤

運夷章第九

持而盈之不如其已揣而銳之不可長保金玉滿堂莫之能守富貴而驕自遺其咎功成